

## HØYRINGSSVAR OM TENESTEDIREKTIVET FRÅ SENTERUNGDOMEN

Senterungdomen meiner at regjeringa skal legga ned veto mot Tenestedirektivet. Direktivet vil føre til at norsk arbeidsrett blir lagt under juridisk kontroll frå EF-domstolane og dommane dei vedtek, i staden for at området styrast politisk slik som i dag. Vi meiner at dette er ei svært uheldig demokratisk utvikling, der ein får ei skeivbalanse i maktfordelingsprinsippet mellom lovgivande og dømmande makt.

EF-domstolen har i det siste lagt fram fire prinsipielle dommar som viser korleis dei meiner arbeidsmarknaden i Europa skal vera. Det dreier seg om Vaxholmdommen, Viking Line-dommen, Rüffertdommen og Luxemburgdommen. Vaxholmdommen slo fast at foretak etablert i utlandet ikkje kan påleggast å følge svenske tariffavtaler når de utfører oppdrag i Sverige. Så kom Viking Line-dommen som endte med eit forbod mot faglege aksjonar når eit rederi vil flagge ut eit skip til eit land med lågare lønninger, og Rüffertdommen som slo fast at det er forbode å kreva tarifflønn ved offentlege byggeoppdrag slik den tyske delstaten Niedersachsen hadde prøvd. Førebels til slutt har vi dommen der Luxemburg vart dømt til å fjerne ei lov som gir utanlandske arbeidstakere dei same rettane i arbeidslivet som innanlandske arbeidstakrar.

I tillegg til det prinsipielle ved feilutviklinga i demokratiet ser ein dermed at også arbeidslivet i praksis vil svekkast ved innføringa av Tenestedirektivet. Dei fire dommane Vaxholmdommen, Viking Line-dommen, Rüffertdommen og Luxemburgdommen viser at sjølv om opphavslandsprinsippet på papiret er teki ut av direktivet, finst det der i praksis. I alle fire døma dreier det seg om arbeidstakrarar frå andre land ikkje treng å følgje arbeidsretten i det landet dei vel å jobbe i. Dette vil i praksis føre til meir sosial dumping og enno fleire tilfelle av därlege tilhøve på arbeidsplassane.

Senterungdomen bygger politikken sin på ein tankegang om at samfunnet skal underleggast demokratisk kontroll, og at det skal byggast nedanfrå. I tillegg ser vi på sosial utjamning som viktig. Med denne ideologiske bakgrunnen kan vi ikkje på nokon som helst måtte stille oss bak ei sanksjonering av Tenestedirektivet, og krevar derfor at regjeringa nyttar den reservasjonsretten som ligg i EØS-avtala og legg ned veto mot direktivet.